



MOHAMMAD SYUKRI METUSSIN menunjukkan Aplikasi Salam Halal KL bagi umat Islam mencari dan memastikan ketulenan status halal premis makanan mengikut spesifikasi Jakim dalam sidang akhbar di UPM, Serdang, Selangor, semalam. - UTUSAN/MOHD. AZIM ABD. RAHMAN

UPM perkenal aplikasi *Salam Halal KL* pastikan ketulenan logo halal

KUALA LUMPUR 27 Okt. - Universiti Putra Malaysia (UPM) melancarkan aplikasi yang membolehkan umat Islam di sekitar ibu kota mencari dan memastikan ketulenan status halal premis makanan mengikut spesifikasi Jabatan Kemajuan Islam Malaysia (Jakim) melalui telefon pintar.

Aplikasi yang dinamakan *Salam Halal KL* itu dihasilkan pelajar Institut Penyelidikan Produk Halal (IPPH) UPM, Mohammad Syukri Metussin.

Menurut Mohammad Syukri, aplikasi menggunakan teknologi *Augmented Reality* yang menawarkan ciri-ciri interaktif itu adalah yang pertama seumpamanya di dunia.

Jelasnya, aplikasi tersebut turut mempunyai ciri rangkaian sosial tersendiri yang membolehkan pengguna berkongsi gambar hidangan makanan dan memberi komen mengenai premis makanan halal yang mereka kunjungi.

“Paparan pada skrin adalah logo persijilan halal yang me-

nandakan lokasi premis makanan tersebut dan jarak dari tempat mereka berada. Aplikasi ini turut membuka peluang pengiklanan untuk premis makanan yang mempunyai sijil halal.

“Buat masa ini, aplikasi *Salam Halal KL* hanya terhad di kawasan Kuala Lumpur dan sedang dalam perancangan untuk diperluaskan bukan sahaja ke seluruh negara, malah di pasaran global,” katanya dalam Majlis Pelancaran Salam Halal KL di UPM dekat sini hari ini.

Yang turut hadir, Penyelia IPPH, Dr. Nurdeng Deuraseh dan Dr. Rodziah Atan.

Setakat ini, aplikasi itu boleh dimuat turun secara percuma di *Google Playstore* dan dalam masa yang sama, pembangunan dan penyelidikan (R&D) sedang dilakukan bagi *App Store* untuk pengguna telefon pintar *Iphone*.

Tambah Mohammad Shukri, aplikasi tersebut memudahkan pelancong beragama Islam yang mementingkan status halal men-

cari makanan ketika berada di sekitar ibu kota.

“Meskipun kita tahu Jakim mewajibkan premis makanan memaparkan sijil halal, tetapi masih ada peniaga yang tidak bertanggungjawab meletakkan sijil halal palsu demi menarik pelanggan.

“Di sinilah peranan aplikasi ini untuk memastikan sijil halal tersebut diperakui Jakim atau tidak,” jelasnya.

Dalam pada itu, Dr. Nurdeng berkata, aplikasi tersebut juga merupakan satu langkah pemeraksanaan sistem makanan halal dalam negara.

“Sistem makanan halal yang dikendalikan oleh Jakim memang sudah terkenal dan diperakui hebat di negara luar seperti Turki dan Kuwait.

“Dengan adanya aplikasi telefon pintar yang menggabungkan unsur teknologi dan syariah seperti ini, orang luar akan bertambah yakin dan percaya dengan kualiti sistem kita,” katanya.